



MINORITY SAFEPACK

Un milion di firmis pe diversità in Europe.

Il sproc de Union Europeane al è *"In varietate concordia - United in diversity"*. **"Unità te diversità"**: peraulis che a esprimin inclusion e solidarità tai confronts di ducj, cence escludi nissun. Te realtà dai fats, però, no je simpri cussì: i **dirits des minorancis nazionâls e linguistichis**, par esempli, no vegnin simpri rispjetâts. In tancj câs, la lôr lenghe e la lôr culture a son in pericol ma chestis comunitâts a vuelin continuâ a vivi daûr des lôr tradizions e cu la lôr identitât.

Intai 47 Paîs de Europe, a esistin cirche 340 minorancis cun plui di 100 milions di partignints. Cun di plui, dome te Union Europeane, a son plui di 60 lenghis regionâls o minoritariis feveladis di cirche 40 milions di personis, dongje des 23 uffiâls. Se o volin mantignî une Europe "diverse", chest al è il moment di supuartâ e promovî ancje chestis particolaritâts e i valôrs che a rapresentin.

Si pues fâlu aderint ae petizion **Minority SafePack**, une iniziativa dai citadins europeans che e rapresente une des plui impuartantis azions di solidaritât dai ultins agns.

Minority SafePack al è formât di un insiemi di **propuestis di leç** pe protezion des minorancis, cuntune **racuete di ats legâi de Union Europeane** pe promozion e la tutele dai dirits di chestis, des lenghis regionâls o minoritariis e des lôr culturis. Il fin de iniziative al è chel di rindi la Union Europeane, che tal timp e à dispès ignorât chestis richiestis, **la vere promotore de diversità**, puartantle a pâr dal so sproc, miorant la tutele des personis che a fasin part di minorancis nazionâls o linguistichis e infuortint la diversità linguistiche e culturâl in Europe.

La petizion e à tant che obietif chel di "fâ sintî a cjase" dutis lis personis che in Europe a fasin part di une minorance linguistiche o nazionâl e e vûl jessi une maniere par valorizâ la comunitât europeane midiant lis sôs lenghis e lis sôs culturis, cence gjavâ nuie aes comunitâts di maiorance.

Par che i nûf ponts dal *Minority SafePack* ricognossûts de Comission Europeane a diventin uffiâi, si à di racuei un milion di firmis dentri dai **2 di Avril dal 2018**.

L'obietif al è ambiziôs e al devente ancjemò plui impuartant pe nestre comunitât regionâl li che di secui a convivin plui minorancis.

La ARLeF, Agenzie Regionâl pe Lenghe Furlane, e sosten il "Minority SafePack"; o podês fâlu ancje voaltris, firmant la petizion su

<https://ec.europa.eu/citizens-initiative/32/public>

Par vê altris informazions, si pues visitâ il sît
www.minority-safepack.eu